

**'Pemalsuan surat mungkin berpunca di sekretariat'  
Malaysiakini.com  
Disember 2, 2010**

Bekas setiausaha agung PKR Datuk Salehuddin Hashim berkata beliau tidak dapat menuduh individu tertentu yang bertanggungjawab memalsukan surat yang didakwa bukti pemecatan S Jenapala daripada parti.

Bagaimanapun, beliau berkata urusan surat menyurat seperti itu biasanya dikendalikan sekretariat parti yang dipimpinnya sebelum ini.

"Tak tahulah, saya (sendiri) tidak pernah buat.

"Yang saya tahu rangka organisasi, perkara seperti ini berlaku dalam sekretariat yang pernah saya pimpin," katanya sambil ketawa kecil.

Bercakap dalam satu sidang media di sebuah kelab golf di Petaling Jaya hari ini, beliau menjelaskan bahawa urusan berkenaan sering ditugaskan kepada timbalannya.

"Selalunya, di zaman saya dulu, kerana terlalu banyak kerja timbalan-timbalan saya akan drafkan surat setelah mendapat arahan saya.

"Setelah didrafkan, dibaca, dan saya setuju, (kemudian) surat itu sama ada saya tandatangani atau benarkan tandatangan elektronik saya digunakan.

"Jadi, sesiapa saja (mungkin melakukannya). Tidak adil bagi kita menuduh sesiapa di peringkat ini.

"Tapi kalau kita buat siasatan, gelanggang suspicion itu akan menjadi lebih kecil dan semestinya orang yang memalsukan itu dapat kita kenali," tambahnya.